



EEU

იურიდიულ და სოციალურ მეცნიერებათა
ფაკულტეტის დებულება

*დამტკიცებულია: უნივერსიტეტის რექტორის 2020
წლის 24 ივნისის №05/01-01 ბრძანებით*

სარჩევი

თავი პირველი -ზოგადი დებულებები

მუხლი 1. ფაკულტეტის სტატუსი და დებულების რეგულირების სფერო

მუხლი 2. ფაკულტეტის მიზნები, ამოცანები და ფუნქციები

თავი მეორე - ფაკულტეტის სტრუქტურა და მართვა

მუხლი 3. ფაკულტეტის სტრუქტურა

მუხლი 4 . ფაკულტეტის საბჭო და მისი ფორმირება

მუხლი 5. ფაკულტეტის საბჭოს უფლებამოსილებები

მუხლი 6. ფაკულტეტის საბჭოს ფუნქციონირების პროცედურული საკითხები

მუხლი 7. ფაკულტეტის დეკანი

მუხლი 8. ფაკულტეტის დეკანის მოვალეობები და უფლებამოსილებები

მუხლი 9. სადისერტაციო საბჭო

მუხლი 10. აკადემიური პროგრამების განვითარების კომიტეტი

მუხლი 11. სტრუქტურული ერთეულების შექმნისა და გაუქმების წესი

თავი მესამე - ფაკულტეტის ბიუჯეტი

მუხლი 12. ფაკულტეტის ბიუჯეტი

თავი მეოთხე - დასკვნითი და გარდამავალი დებულებები

მუხლი 13. ფაკულტეტის დებულების მიღების, გაუქმების, მასში ცვლილებისა და დამატების შეტანის წესი

მუხლი 14. გარდამავალი დებულებანი

თავი I ზოგადი დებულებები

მუხლი 1. ფაკულტეტის სტატუსი და დებულების რეგულირების სფერო

- 1.1. შპს აღმოსავლეთ ევროპის უნივერსიტეტის (შემდგომში „უნივერსიტეტი“) იურიდიულ და სოციალურ მეცნიერებათა ფაკულტეტი (შემდგომში „ფაკულტეტი“) წარმოადგენს უნივერსიტეტის ძირითად საგანმანათლებლო ერთეულს, რომელიც აკადემიური თავისუფლების ფარგლებში უზრუნველყოფს სტუდენტთა მომზადებას ერთ ან რამდენიმე სპეციალობაში და ანიჭებს მათ შესაბამის კვალიფიკაციას.
- 1.2. წინამდებარე დებულება განსაზღვრავს ფაკულტეტის სტატუსს, მიზნებს, ამოცანებსა და კომპეტენციის სფეროებს, ფაკულტეტის სტრუქტურას, სტრუქტურული ერთეულების საქმიანობის წესსა და უფლებამოსილებებს.
- 1.3. ფაკულტეტს აქვს ბეჭედი, სატიტულო ფურცელი, საკონტაქტო ელ-ფოსტა და უნივერსიტეტის ოფიციალურ ვებ-გვერდის ფარგლებზე საკუთარი განყოფილება. სატიტულო ფურცელზე ხელს აწერს დეკანი საქართველოს კანონმდებლობით, უნივერსიტეტის რეგულაციებითა და წინამდებარე დებულებით განსაზღვრული წესით.
- 1.4. ფაკულტეტი ანგარიშვალდებულია უნივერსიტეტის რექტორის წინაშე.
- 1.5. ფაკულტეტის შექმნის, რეორგანიზაციის ან გაუქმების შესახებ გადაწყვეტილებას იღებს აღმოსავლეთ ევროპის უნივერსიტეტის რექტორი, სამართლებრივი აქტით-ბრძანებით, წარმომადგენლობითი საბჭოს არგუმენტირებული წარდგინების საფუძველზე.
- 1.6. ფაკულტეტი თავის საქმიანობაში ხელმძღვანელობს საქართველოს კანონმდებლობით, უნივერსიტეტის დებულებით, წინამდებარე დებულებითა და უნივერსიტეტის სხვა სამართლებრივი აქტებით.

მუხლი 2. ფაკულტეტის მიზნები, ამოცანები და ფუნქციები

2.1. ფაკულტეტის მიზნებია:

- 2.1.1 უზრუნველყოს თანამედროვე სტანდარტების შესაბამისი და ხელმისაწვდომი განათლების მიღების შესაძლებლობა, მისცეს სტუდენტს ღრმა ცოდნა სტუდენტის მიერ არჩეულ კონკრეტულ სფეროში.
- 2.1.2 მოამზადოს შრომის ბაზარზე კონკურენტუნარიანი კადრები ბაკალავრიატის, მაგისტრატურისა და დოქტორანტურის საფეხურებზე.

2.2. ფაკულტეტის ამოცანები და ფუნქციებია:

- 2.2.1 სტუდენტზე ორიენტირებული აკადემიური გარემოს, ასევე სწავლისა და დამოუკიდებელი კვლევისათვის სათანადო პირობების შექმნა;
- 2.2.2 სასწავლო პირობების გაუმჯობესებაზე მუდმივად ზრუნვა;

- 2.2.3 სამეცნიერო-კვლევითი პროექტების განხორციელებისა და ფაკულტეტის სტუდენტთა და აკადემიური პერსონალის საგანმანათლებლო, სამეცნიერო-კვლევით პროექტებში ჩართულობის ხელშეწყობა, კვლევის შედეგების ინტეგრირება სასწავლო პროცესში;
- 2.2.4 სტუდენტისა და აკადემიური პერსონალის პროფესიულ განვითარებაზე ზრუნვა;
- 2.2.5 აკადემიური თავისუფლებისა და კეთილსინდისიერების პრინციპების დაცვის უზრუნველყოფა;
- 2.2.6 ფაკულტეტის სტუდენტებისა და აკადემიური პერსონალის მობილობის ხელშეწყობა;
- 2.2.7 სამოქალაქო საზოგადოებისა და ზოგადსაკაცობრიო დემოკრატიული ფასეულობების განვითარების ხელშეწყობა;
- 2.2.8 ფაკულტეტის მართვაში სტუდენტებისა და აკადემიური პერსონალის ჩართვის უზრუნველყოფა;
- 2.2.9 აკადემიური უმაღლესი განათლების (ბაკალავრიატი, მაგისტრატურა, დოქტორანტურა) საგანმანათლებლო პროგრამების შემუშავებაში მონაწილეობა და განხორციელება, მათი განვითარების პროცესში დაინტერესებული პირების ჩართვა და პროგრამების გაუმჯობესებაზე ზრუნვა.

თავი II ფაკულტეტის სტრუქტურა და მართვა

მუხლი 3. ფაკულტეტის სტრუქტურა

- 3.1. ფაკულტეტის მართვის ორგანო/ სუბიექტია:
 - ა. ფაკულტეტის საბჭო;
 - ბ. ფაკულტეტის დეკანი.
- 3.2. ფაკულტეტზე არსებული სტრუქტურული ერთეულებია:
 - ა. სადისერტაციო საბჭო;
 - ბ. აკადემიური პროგრამების განვითარების კომიტეტი.
- 3.3. ფაკულტეტზე სამეცნიერო კვლევების განხორციელების მიზნით, ფაკულტეტის შემადგენლობაში სტრუქტურული ქვედანაყოფის სახით შეიძლება ასევე შედიოდეს სასწავლო - სამეცნიერო და/ან სამეცნიერო - კვლევითი ერთეულები (ცენტრი/ინსტიტუტი). ფაკულტეტის შემადგენლობაში შემავალი სასწავლო და სამეცნიერო - კვლევითი ერთეულების შექმნისა და მისი დებულების დამტკიცების თაობაზე გადაწყვეტილებას იღებს ფაკულტეტის საბჭო. ფაკულტეტის შემადგენლობაში შემავალი სასწავლო და სამეცნიერო - კვლევითი ერთეულების სტრუქტურა და საქმიანობის წესი განისაზღვრება სასწავლო და/ან სამეცნიერო - კვლევითი ერთეულების დებულებით.
- 3.4. სასწავლო პროცესის ეფექტიანი ადმინისტრირების მიზნით ფაკულტეტის შემადგენლობაში წარმოდგენილია: ფაკულტეტის დეკანის მოადგილე/მოადგილეები, კოორდინატორები და სპეციალისტები (შემდგომში- ფაკულტეტის ადმინისტრაცია)
- 3.5. ფაკულტეტის ადმინისტრაცია უზრუნველყოფს სასწავლო პროცესის ორგანიზებას, სასწავლო პროცესის მართვას, საგანმანათლებლო პროგრამების (საბაკალავრო, სამაგისტრო ან სადოქტორო) ადმინისტრირებას, სტუდენტთა მომსახურებას, შესაბამისი

მიმართულებებით სამეცნიერო კვლევების ორგანიზებას, ასევე ფაკულტეტზე სხვა ორგანიზაციული საკითხების მოწესრიგებას.

- 3.6. ფაკულტეტის ადმინისტრაციის თანამშრომლებს თანამდებობაზე ნიშნავს და ათავისუფლებს უნივერსიტეტის რექტორი დეკანის წარდგინებით, მათი ფუნქციები და მოვალეობები განსაზღვრულია სამუშაო აღწერილობებითა და მათთან დადებული შრომითი ხელშეკრულებებით.
- 3.7. ფაკულტეტზე საგანმანათლებლო პროგრამების განხორციელება უზრუნველყოფილია აკადემიური და მოწვეული პერსონალის მიერ, მათი თანამდებობაზე არჩევის/დანიშვნის წესი და უფლება-მოვალეობები განისაზღვრება უნივერსიტეტის შიდა რეგულაციებით, სამუშაო აღწერილობებითა და მათთან დადებული შრომითი ხელშეკრულებებით.
- 3.8. საგანმანათლებლო პროგრამას ხელმძღვანელობს პროგრამის ხელმძღვანელი, რომლის ფუნქციები განისაზღვრება მისი სამუშაო აღწერილობით.
- 3.9. ფაკულტეტი, საკუთარი საქმიანობის ეფექტიანად განხორციელების მიზნით უფლებამოსილია ხელშეკრულების საფუძველზე მოიწვიოს შესაბამისი საჭიროებისა და კომპეტენციის პირი/პირები.

მუხლი 4 . ფაკულტეტის საბჭო და მისი ფორმირება

- 4.1 ფაკულტეტის საბჭო არის ფაკულტეტის წარმომადგენლობითი ორგანო, რომლის ფორმირების წესი განისაზღვრება წინამდებარე დებულებით.
- 4.2 ფაკულტეტის საბჭო შედგება შვიდი წევრისაგან. ფაკულტეტის საბჭოს შემადგენლობაში შედიან ფაკულტეტის დეკანი, ფაკულტეტის აკადემიური პერსონალის ოთხი არჩეული წარმომადგენელი და ორი სტუდენტთა წარმომადგენელი. ფაკულტეტის საბჭოს წევრი, გარდა დეკანისა, ერთდროულად არ შეიძლება იყოს უნივერსიტეტის ადმინისტრაციული თანამდებობის პირი და წარმომადგენლობითი საბჭოს წევრი.
- 4.3 ფაკულტეტის საბჭოს წევრობის კანდიდატი შეიძლება იყოს ფაკულტეტის პროფესორი, ასოცირებული პროფესორი, ასისტენტ-პროფესორი და ასისტენტი.
- 4.4 ფაკულტეტის საბჭოს თავმჯდომარეა დეკანი ან მისი წარდგინებით ფაკულტეტის საბჭოს ერთ-ერთი წევრი აკადემიური პერსონალის წარმომადგენელი.
- 4.5 ფაკულტეტის საბჭოს წევრთა არჩევნები ინიშნება რექტორის სამართლებრივი აქტის საფუძველზე და ინფორმაციის საჯარო გაცნობის მიზნით, ქვეყნდება ყველასათვის ხელმისაწვდომ და თვალსაჩინო ადგილას, არჩევნების ჩატარებამდე ერთი კვირით ადრე.
- 4.6 ფაკულტეტის საბჭოში აკადემიური პერსონალისა და სტუდენტთა წარმომადგენლების არჩევნების ჩასატარებლად უნივერსიტეტის რექტორი ქმნის **უნივერსიტეტის საარჩევნო** კომისიას და განსაზღვრავს კომისიის თავმჯდომარესა და მდივანს.
- 4.7 უნივერსიტეტის საარჩევნო კომისია უფლებამოსილია, მიიღოს ყველა გადაწყვეტილება არჩევნების საორგანიზაციო და პროცედურულ საკითხებთან დაკავშირებით. შესაძლებელია ფაკულტეტის საარჩევნო კომისიის წერილობითი დასაბუთებული გადაწყვეტილებით უარის ეთქვას პირს რეგისტრაციაზე.

- 4.8 ფაკულტეტის საბჭოში აკადემიური პერსონალის წარმომადგენლები აირჩევიან აკადემიური პერსონალის საერთო კრებაზე ღია კენჭისყრით. კენჭისყრის შედეგები ჯამდება სათანადო ოქმით.
- 4.9 კანდიდატების დასახელება ხდება აკადემიური პერსონალის საერთო კრებაზე. კრება უფლებამოსილია, თუ მას ესწრება ფაკულტეტის აკადემიური პერსონალის ნახევარზე მეტი. აკადემიური პერსონალის წარმომადგენლებს შეუძლიათ როგორც საკუთარი, ასევე სხვა კანდიდატურების დასახელება. ყოველ კანდიდატს ეყრება კენჭი ინდივიდუალურად. უკეთესი შედეგის მქონე კანდიდატი (კანდიდატები) ხდება ფაკულტეტის საბჭოს წევრი. თანაბარი ხმების მიღების შემთხვევაში იმავე სხდომაზე ტარდება განმეორებითი კენჭისყრა.
- 4.10 ფაკულტეტის საბჭოს წევრად არჩეული აკადემიური პერსონალის უფლებამოსილების ვადა განისაზღვრება აკადემიური თანამდებობისათვის დადგენილი ვადის შესაბამისად, მაგრამ არა უმეტეს 4 წლის ვადისა. აკადემიური თანამდებობისათვის დადგენილი ვადის გასვლის ან აკადემიური თანამდებობის ვადაზე ადრე დატოვების შემთხვევაში (დეკანის შემთხვევაში დეკანის უფლებამოსილების შეწყვეტის შემთხვევაში) პირს ავტომატურად უწყდება ფაკულტეტის საბჭოს წევრის სტატუსი.
- 4.11 ფაკულტეტის საბჭოს წევრის უფლებამოსილების ვადაზე შეწყვეტის გამო, ფაკულტეტის საბჭოს უფლებამოსილების დარჩენილი ვადით მისი წევრი ხდება კანდიდატი, რომელმაც ფაკულტეტის საბჭოს არჩევნებში ვადაზე ადრე უფლებამოსილება შეწყვეტილი წევრის შემდეგ ხმების უმეტესი რაოდენობა მიიღო. ასეთის არარსებობის შემთხვევაში ფაკულტეტის საბჭოს ვაკანტური ადგილის დასაკავებლად იმართება განმეორებითი არჩევნები ამ მუხლით განსაზღვრული პროცედურების დაცვით.
- 4.12 ფაკულტეტის საბჭოს წევრობის მსურველი სტუდენტი რექტორის ბრძანებით განსაზღვრულ ვადაში დასაბუთებული განცხადებით მიმართავს საარჩევნო კომისიას მისი საბჭოს წევრობის კანდიდატად დარეგისტრირების თხოვნით. უნივერსიტეტის საარჩევნო კომისია რეგისტრაციის დასრულებისთანავე ადგენს სტუდენტ კანდიდატთა ერთიან სიას და უგზავნის თვითმმართველობას.
- 4.13 ფაკულტეტის საბჭოში სტუდენტი წევრები კანდიდატთა სიიდან აირჩევიან სტუდენტთა თვითმმართველობის მიერ 2 წლის ვადით თავისუფალი და თანასწორი არჩევნების საფუძველზე, ფარული კენჭისყრით. თვითმმართველობა უფლებამოსილია, თუ მას ესწრება სტუდენტთა თვითმმართველობის წევრების ნახევარზე მეტი.
- 4.14 სტუდენტი კანდიდატებისთვის ხმის მიცემა ხორციელდება საარჩევნო ბიულეტენზე სათანადო აღნიშვნით და საარჩევნო ბიულეტენის საარჩევნო ყუთში მოთავსებით. საარჩევნო ბიულეტენის დაბეჭდვაზე პასუხისმგებელია საარჩევნო კომისია.
- 4.15 არჩევნების განსხვავებული ფორმატით (ელექტრონული პლატფორმის მეშვეობით) ჩატარების შემთხვევაში, არჩევნების ჩატარების წესი და პროცედურა განისაზღვრება წინამდებარე დებულების 4.23-ე პუნქტით.
- 4.16 საარჩევნო ბიულეტენი ბათილია, თუ:
- ა) არ აღმოჩნდა საარჩევნო ბიულეტენზე ხელმომწერი კომისიის წევრის ხელმოწერა;
 - ბ) თუ არ არის შემოხაზული არცერთი კანდიდატურა;

- გ) თუ შემოხაზულია თითოეული ფაკულტეტიდან ორზე მეტი კანდიდატურა;
 დ) თუ შეუძლებელია გაირკვეს, რომელ კანდიდატს მისცა ხმა ამომრჩეველმა.
- 4.17 ფაკულტეტის საბჭოში სტუდენტი წევრების არჩევნების კენჭისყრის შედეგები ჯამდება სათანადო ოქმით.
- 4.18 თუ არჩევნებში მონაწილე სტუდენტმა კანდიდატებმა მიიღეს ხმების თანაბარი რაოდენობა, იმართება განმეორებითი არჩევნები. განმეორებით არჩევნები ტარდება თანაბარი შედეგის მქონე კანდიდატებს შორის ამ დებულებით დადგენილი პროცედურების დაცვით.
- 4.19 ფაკულტეტის საბჭოს წევრად არჩეულ აკადემიურ პერსონალსა და სტუდენტთა წარმომადგენლებს საარჩევნო კომისიის თავმჯდომარე ფაკულტეტზე არჩევნების ჩატარებიდან 2 სამუშაო დღის ვადაში, სათანადო ოქმებთან ერთად, წარუდგენს უნივერსიტეტის რექტორს დასამტკიცებლად.
- 4.20 არჩევნების შედეგების გამოცხადებიდან 24 საათის განმავლობაში კანდიდატს, უნივერსიტეტის საარჩევნო კომისიის წევრს ან ამომრჩეველს უფლება აქვს, შეიტანოს საჩივარი ამ დებულებით განსაზღვრული წესის დარღვევასთან დაკავშირებით უნივერსიტეტის წარმომადგენლობით საბჭოში. ამ ვადის გასვლის შემდეგ საჩივრები არ მიიღება. არჩევნების ბათილად ცნობის შესახებ გადაწყვეტილებას წარმომადგენლობითი საბჭო იღებს იმ შემთხვევაში, თუ მიიჩნევს, რომ გამოვლენილმა დარღვევამ არსებითი გავლენა იქონია არჩევნების შედეგზე.
- 4.21 ფაკულტეტის საბჭოს წევრი სტუდენტი სტუდენტის სტატუსის შეჩერების/შეწყვეტის, ასევე სხვა ფაკულტეტზე მობილობის წესით გადასვლის შემთხვევაში ავტომატურად კარგავს ფაკულტეტის საბჭოს წევრობის უფლებას. ახალი წევრის არჩევა ხდება ამ დებულებით დადგენილი წესით.
- 4.22 სტუდენტური თვითმმართველობის წევრს არ შეუძლია, მონაწილეობა მიიღოს არჩევნებში, როგორც ფაკულტეტის საბჭოს წევრობის კანდიდატმა.
- 4.23 ფაკულტეტის საბჭოს წევრების არჩევნები, განსაკუთრებულ შემთხვევაში, შესაძლებელია ჩატარდეს ელექტრონული პლატფორმის გამოყენებით. ფაკულტეტის საბჭოს წევრის არჩევნების ელექტრონულად ჩატარების შემთხვევაში უზრუნველყოფილი უნდა იყოს ამომრჩეველების ვიზუალური და აუდიო იდენტიფიცირება. ფაკულტეტის საბჭოს სტუდენტი წევრის არჩევნების ელექტრონულად ჩატარების შემთხვევაში ხმის მიცემა მოხდება ელექტრონული გამოკითხვის ფორმით, ანონიმურობის დაცვით.

მუხლი 5. ფაკულტეტის საბჭოს უფლებამოსილებები

5.1. ფაკულტეტის საბჭო:

- 5.1.1 დეკანის წარდგინებით განიხილავს და დასამტკიცებლად წარუდგენს უნივერსიტეტის წარმომადგენლობით საბჭოს ფაკულტეტის სტრუქტურას, დებულებას, მასში შესატან ცვლილებებსა და დამატებებს;
- 5.1.2 დეკანის წარდგინებით განიხილავს, განსაზღვრავს და წარუდგენს უნივერსიტეტის წარმომადგენლობით საბჭოს ფაკულტეტის ბიუჯეტის პროექტს;

- 5.1.3 ამტკიცებს ფაკულტეტის აკადემიური პროგრამების განვითარების კომიტეტის რეგლამენტს;
- 5.1.4 განიხილავს ახალი საგანმანათლებლო პროგრამის ინიცირების საკითხს და იღებს გადაწყვეტილებას საგანმანათლებლო პროგრამის შემუშავების შესახებ, რომელსაც წარუდგენს ფაკულტეტის აკადემიური პროგრამების განვითარების კომიტეტს შემდგომი რეაგირებისთვის.
- 5.1.5 ხარისხის უზრუნველყოფის სამსახურის დადებითი დასკვნის საფუძველზე ფაკულტეტის აკადემიური პროგრამების განვითარების კომიტეტის წარგინებით განიხილავს საგანმანათლებლო პროგრამას, მასში განსახორციელებელ ცვლილებებსა და დამატებებს და წარუდგენს წარმომადგენლობით საბჭოს დასამტკიცებლად;
- 5.1.6 განიხილავს საგანმანათლებლო პროგრამის გაუქმების საკითხს და საკუთარ გადაწყვეტილებას წარუდგენს წარმომადგენლობით საბჭოს საბოლოო გადაწყვეტილების მიღების მიზნით.
- 5.1.7 დეკანის წარდგინებით განიხილავს და დასამტკიცებლად წარუდგენს უნივერსიტეტის წარმომადგენლობით საბჭოს სამეცნიერო-კვლევით პროგრამებს;
- 5.1.8 დეკანის წარდგინებით განიხილავს ფაკულტეტის აკადემიური პროგრამების განვითარების კომიტეტში წარსადგენი პირების კანდიდატურებს და იღებს შესაბამის გადაწყვეტილებას.
- 5.1.9 ამტკიცებს ფაკულტეტის სადისერტაციო საბჭოსა და დოქტორანტურის დებულებას, შეაქვს მასში ცვლილებები და დამატებები;
- 5.1.10 განსაზღვრავს ფაკულტეტის საგანმანათლებლო პროგრამებზე ერთიანი ეროვნული/საერთო სამაგისტრო გამოცდებისათვის კოეფიციენტებს, ასევე მისაღებ სტუდენტთა რაოდენობას განათლების დეპარტამენტთან კოორდინირებით და დასამტკიცებლად წარუდგენს უნივერსიტეტის წარმომადგენლობით საბჭოს;
- 5.1.11 მაგისტრანტობისა და დოქტორანტობის კანდიდატებისთვის შემუშავებს უნივერსიტეტის მიერ განსაზღვრული გამოცდის ჩატარების ფორმატს;
- 5.1.12 ხელს უწყობს სწავლებისა და კვლევის ხარისხის უზრუნველყოფის მექანიზმების განხორციელებას;
- 5.1.13 იღებს გადაწყვეტილებას აკადემიური უმაღლესი განათლების საფეხურების - ბაკალავრიატისა და მაგისტრატურის - დამთავრებისას პირისათვის კვალიფიკაციის მინიჭების თაობაზე;
- 5.1.14 უნივერსიტეტის წარმომადგენლობით საბჭოს წარუდგენს კანდიდატურებს საპატიო დოქტორის და სხვა ჯილდოების მისანიჭებლად;
- 5.1.15 განიხილავს უნივერსიტეტის წარმომადგენლობითი საბჭოს აფილირებული აკადემიური პერსონალისა და სტუდენტი წევრების კანდიდატურებს და წარუდგენს უნივერსიტეტის რექტორს დასამტკიცებლად;
- 5.1.16 ახორციელებს ამ დებულებით, უნივერსიტეტის დებულებით და სხვა შიდა სამართლებრივი აქტებით მინიჭებულ სხვა უფლებამოსილებებს.

მუხლი 6. ფაკულტეტის საბჭოს ფუნქციონირების პროცედურული საკითხები

- 6.1. ფაკულტეტის საბჭო პირველ სხდომაზე ცნობს თავის უფლებამოსილებას და საბჭოს წევრი აკადემიური პერსონალის შემადგენლობიდან ღია კენჭისყრით ირჩევს ფაკულტეტის

- საბჭოს მდივანს, ფაკულტეტის დეკანის მიერ საბჭოს თავმჯდომარეობაზე უარის შემთხვევაში, მისი წარდგინებით საბჭო კენჭს უყრის წარდგენილ კანდიდატურას.
- 6.2. ფაკულტეტის საბჭოს თავმჯდომარეობს საბჭოს თავმჯდომარე. მისი არყოფნის შემთხვევაში თავმჯდომარის ფუნქციას საბჭოს გადაწყვეტილებით ასრულებს ფაკულტეტის საბჭოს მიერ უმრავლესობით არჩეული საბჭოს ნებისმიერი წევრი აკადემიური პერსონალის შემადგენლობიდან.
 - 6.3. ფაკულტეტის საბჭოს მდივანი უზრუნველყოფს ფაკულტეტის საბჭოს საქმისწარმოებას. ფაკულტეტის საბჭოს სხდომაზე მდივნის არყოფნის შემთხვევაში მის ფუნქციას ასრულებს ფაკულტეტის საბჭოს მიერ უმრავლესობით არჩეული საბჭოს ნებისმიერი წევრი აკადემიური პერსონალის შემადგენლობიდან.
 - 6.4. ფაკულტეტის საბჭოს სხდომის დღის წესრიგის პროექტს ამზადებს საბჭოს მდივანი საბჭოს თავმჯდომარის მითითებით. ფაკულტეტის საბჭოს წევრებს შეუძლიათ საბჭოს მდივნისათვის დღის წესრიგის პროექტში გასათვალისწინებელი საკითხების მიწოდება წერილობით. ფაკულტეტის საბჭოს მდივანი ფაკულტეტის საბჭოს სხდომის თარიღამდე 3 დღით ადრე აცნობებს ფაკულტეტის საბჭოს წევრებს სხდომის დღის წესრიგის პროექტს.
 - 6.5. ფაკულტეტის საბჭო სხდომის დაწყებისთანავე ღია კენჭისყრით ამტკიცებს დღის წესრიგს.
 - 6.6. ფაკულტეტის საბჭოს სხდომის მოწვევის უფლება აქვს ფაკულტეტის საბჭოს თავმჯდომარეს, ან დეკანს საბჭოს თავმჯდომარისათვის შესაბამისი წერილობითი მიმართვის გზით ან ფაკულტეტის საბჭოს არანაკლებ 3 წევრს.
 - 6.7. ფაკულტეტის საბჭო უფლებამოსილია მიიღოს გადაწყვეტილება, თუ სხდომას ესწრება საბჭოს სიითი შემადგენლობის 2/3. გადაწყვეტილება მიღებულად ჩაითვლება, თუ საკითხს მხარი დაუჭირა სხდომაზე დამსწრეთა ნახევარზე მეტმა. ხმების თანაბრად გაყოფის შემთხვევაში საკითხი შესაბამისი კონსულტაციების შემდეგ ახლიდან გამოდის კენჭისყრაზე.
 - 6.8. ფაკულტეტის საბჭოს სხდომაზე კენჭისყრა არის ღია, გარდა კანონმდებლობითა და შიდა რეგულაციებით გათვალისწინებული შემთხვევებისა, ფაკულტეტის საბჭოს არანაკლებ 3 წევრს უფლება აქვს მოითხოვოს ფარული კენჭისყრა. კენჭისყრა იქნება ფარული, თუ მას მხარი დაუჭირა დამსწრე წევრთა უმრავლესობამ.
 - 6.9. ფაკულტეტის საბჭოს ყოველი სხდომის თაობაზე ფორმდება ოქმი, რომელსაც ხელს აწერენ საბჭოს (სხდომის) თავმჯდომარე და მდივანი.
 - 6.10. ფაკულტეტის საბჭოს გადაწყვეტილებით, მისი წევრი/წევრები სხდომის მუშაობაში შეიძლება მონაწილეობდეს/ნენ ელექტრონული პლატფორმის გამოყენებით, იმგვარად, რომ უზრუნველყოფილი იყოს წევრის/წევრების ვიზუალური და აუდიო იდენტიფიცირება.

მუხლი 7. ფაკულტეტის დეკანი

- 7.1. ფაკულტეტს ხელმძღვანელობს და მესამე პირებთან ურთიერთობებში წარმოადგენს ფაკულტეტის დეკანი.

- 7.2. ფაკულტეტს დეკანი ანგარიშვალდებულია უნივერსიტეტის რექტორის წინაშე.
- 7.3. ფაკულტეტის დეკანს თანამდებობაზე ნიშნავს და თანამდებობიდან ათავისუფლებს უნივერსიტეტის რექტორი, უნივერსიტეტის შიდა რეგულაციებით დადგენილი წესით.
- 7.4. დეკანის მიერ თავის უფლებამოსილებათა განხორციელების დროებით შეუძლებლობის შემთხვევაში, მის მოვალეობას ასრულებს დეკანის მოადგილე ან/და უნივერსიტეტის რექტორის მიერ შესაბამისი სამართლებრივი აქტის საფუძველზე განსაზღვრული სხვა პირი.

მუხლი 8. ფაკულტეტის დეკანის მოვალეობები და უფლებამოსილებები

- 8.1. ფაკულტეტის დეკანი:
 - 8.1.1 უზრუნველყოფს ფაკულტეტის ხარისხიან ადმინისტრირებას;
 - 8.1.2 უზრუნველყოფს ფაკულტეტზე სასწავლო-სამეცნიერო საქმიანობის ეფექტიანად წარმართვას;
 - 8.1.3 ფაკულტეტის საბჭოს განსახილველად წარუდგენს ფაკულტეტის საგანმანათლებლო და სამეცნიერო-კვლევით პროგრამებს, წლიურ ანგარიშს;
 - 8.1.4 შეიმუშავებს და ფაკულტეტის საბჭოს განსახილველად წარუდგენს ფაკულტეტის სტრუქტურასა და დებულებას, ასევე ფაკულტეტის ბიუჯეტის პროექტს;
 - 8.1.5 თავისი კომპეტენციის ფარგლებში პასუხისმგებელია უნივერსიტეტის მართვის ორგანოების გადაწყვეტილებების შესრულებაზე;
 - 8.1.6 პასუხისმგებელია ფაკულტეტის ბიუჯეტის მიზნობრივ გამოყენებაზე;
 - 8.1.7 უნივერსიტეტის რექტორს თანამდებობაზე დასანიშნად წარუდგენს დეკანის მოადგილესა და ფაკულტეტის პერსონალის კანდიდატურებს;
 - 8.1.8 განიხილავს და ადგენს ფაკულტეტზე აკადემიური კონკურსის ჩატარების საჭიროებას და წარუდგენს ადამიანური რესურსების მართვის სამსახურს შემდგომი რეაგირებისთვის;
 - 8.1.9 განიხილავს და ადგენს საგანმანათლებლო პროგრამებზე მოწვეული სპეციალისტების საჭიროებას და წარუდგენს ადამიანური რესურსების მართვის სამსახურს შემდგომი რეაგირებისთვის;
 - 8.1.10 ახორციელებს ფაკულტეტის საქმიანობის ეფექტურობის გაზრდისკენ მიმართული ღონისძიებების ინიცირებასა და ხელმძღვანელობისთვის/ფაკულტეტის საბჭოსთვის წარდგენას;
 - 8.1.11 აკადემიური/მოწვეული, ადმინისტრაციული და დამხმარე პერსონალის კვალიფიკაციის ამაღლებისა და პროფესიული განვითარების ანდა წახალისების შესახებ წარუდგენს წინადადებებს შესაბამის სტრუქტურულ ერთეულს;
 - 8.1.12 ამტკიცებს სტუდენტთა საბაკალავრო/სამაგისტრო ნაშრომის თემატიკას და საბაკალავრო/სამაგისტრო ნაშრომის ხელმძღვანელს;
 - 8.1.13 ამტკიცებს სტუდენტის ინდივიდუალურ სასწავლო გეგმას.
 - 8.1.14 სასწავლო და სამეცნიერო პროცესის საჭიროების შესაბამისად, ამყარებს კავშირს საქართველოსა და უცხოეთის უმაღლესი სასწავლებლების შესაბამის სტრუქტურულ ერთეულებთან, თავისი უფლებამოსილებისა და კომპეტენციის ფარგლებში;
 - 8.1.15 კოორდინაციას უწევს ფაკულტეტზე სასწავლო ცხრილების ფორმირების პროცესს;
 - 8.1.16 ახორციელებს ფაკულტეტის თანამშრომლებს შორის ფუნქციების გადანაწილებასა და მათ მიერ დაკისრებული ფუნქცია-მოვალეობების ჯეროვნად შესრულებაზე კონტროლს;

- 8.1.17 უზრუნველყოფს ყოველი სემესტრის დასაწყისში აკადემიური და მოწვეული პერსონალის დატვირთვის სქემის შედგენაზე კონტროლს.
- 8.1.18 აკონტროლებს ფაკულტეტზე სტუდენტის აკადემიური მოსწრების მონაცემების დამუშავების პროცესს;
- 8.1.19 მონაწილეობს ფაკულტეტის აკადემიური პერსონალისა და სტუდენტების განვითარებასთან დაკავშირებულ პროცესებში.
- 8.1.20 თავისი კომპეტენციის ფარგლებში გამოსცემს ფაკულტეტის ადმინისტრირებისა და სასწავლო პროცესების საკითხებთან დაკავშირებით სამართლებრივ აქტებს.
- 8.1.21 ახორციელებს ამ დებულებით, უნივერსიტეტის დებულებით, უნივერსიტეტის შიდა სამართლებრივი აქტებითა და საქართველოს კანონმდებლობით მისთვის მინიჭებულ სხვა უფლებამოსილებებს.

მუხლი 9. სადისერტაციო საბჭო

ფაკულტეტის სადისერტაციო საბჭო არის დოქტორის აკადემიური ხარისხის მიმნიჭებელი ორგანო, რომელიც თავის საქმიანობას წარმართავს კანონმდებლობით, უნივერსიტეტის დებულებითა და ფაკულტეტის დოქტორანტურისა და სადისერტაციო საბჭოს დებულების შესაბამისად.

მუხლი 10. აკადემიური პროგრამების განვითარების კომიტეტი

- 10.1. ახალი და არსებული საგანმანათლებლო პროგრამების შექმნისა და განვითარების მიზნით ფაკულტეტზე იქმნება მუდმივმოქმედი აკადემიური პროგრამების განვითარების კომიტეტი.
- 10.2. კომიტეტს ხელმძღვანელობს ფაკულტეტის დეკანი ან დეკანის მოადგილე.
- 10.3. კომიტეტის საქმიანობა და უფლებამოსილება რეგულირდება წინამდებარე დებულებითა და პროგრამის განვითარების კომიტეტის რეგლამენტით, რომელსაც ამტკიცებს ფაკულტეტის საბჭო.

მუხლი 11. სტრუქტურული ერთეულების შექმნისა და გაუქმების წესი

ფაკულტეტის ახალი სტრუქტურული ერთეულის შექმნის ან არსებული ერთეულების გაუქმების შესახებ ფაკულტეტის საბჭო მიმართავს წარმომადგენლობით საბჭოს უნივერსიტეტში დადგენილი წესის მიხედვით.

თავი III ფაკულტეტის ბიუჯეტი

მუხლი 12. ფაკულტეტის ბიუჯეტი

- 12.1. ფაკულტეტის ბიუჯეტი წარმოადგენს უნივერსიტეტის ბიუჯეტის შემადგენელ ნაწილს.
- 12.2. უნივერსიტეტის სამართლებრივი აქტებით დადგენილი წესით, ფაკულტეტი მონაწილეობს უნივერსიტეტის ბიუჯეტის შემუშავების პროცესში.

თავი IV დასკვნითი და გარდამავალი დებულებები

მუხლი 13. ფაკულტეტის დებულების მიღების, გაუქმების, მასში ცვლილებისა და დამატების შეტანის წესი

- 13.1. ფაკულტეტის დებულებას დეკანის წარდგინებით განიხილავს ფაკულტეტის საბჭო და დასამტკიცებლად წარუდგენს უნივერსიტეტის წარმომადგენლობით საბჭოს.
- 13.2. ფაკულტეტის დებულების დამტკიცებას, გაუქმებას, მასში ცვლილებისა და დამატების შეტანას ახორციელებს წარმომადგენლობითი საბჭო უნივერსიტეტის დებულებით, წარმომადგენლობითი საბჭოს დებულებითა და სხვა სამართლებრივი აქტებით დადგენილი წესით.

მუხლი 14. გარდამავალი დებულებანი

წინამდებარე დებულების პირველი რედაქცია დამტკიცებულია უნივერსიტეტის რექტორის მიერ, ხოლო შემდგომში მისი დამტკიცება და ცვლილებების შეტანა განხორციელდება წარმომადგენლობითი საბჭოს მიერ წინამდებარე დებულების მე-13 მუხლის შესაბამისად.